



**Біз ҚазПИ-де оқыдық...**



**ҚазПИ-дің филология факультетінде оқытындардың басым көпшілігі қыздар болыш келеді. Қазір қалайын қайдам, баяғыда солай еді. Бір курста жігіттер ең көп дегенде он саусақтан аса қоймайтын.**

Біз өзіміз окуга түскен 1983 жылы қазақ бөлімінде елу қыздың ішінде төрт-ақ жігіт болдық, орыс-қазақ бөлімінде де сол шамалас, орыс бөлімінде одан да аз. Қазақ бөліміндегі төрт жігіттің бірі біздің кейіпкеріміз – Шымкент облысының Тұлкібас ауданынан онжылдықты бітіре сала окуга түскен Дихан Мыңбаев (қазір Қамзабекұлы) еді.

Бізге ҚазПИ-де қазақ әдебиетінен мынау деген ұстаздар дәріс берді. Аспайтын да саспайтын Серік Қирабаев, сырбаз да сарабдал Нығмет Ғабдуллин, Мағжан өлеңдерін жатқа айтатын Төкен Әбдірахманов, «қаһарлы Грозный патшадайын» Немат Келімбетов, «сылтып басып, жалғандықпен мылтықтасып» жүретін Серік Мақпыров, Бейімбеттің «Мырқымбайын» мың түрлентіп оқытын Тұрсын Сыдықов, «әдебиеттің өз ішінен келген» Тәңізбай Рахымжанов, «Абай жолынан» тұтас абзацтарды түйдек-түйдегімен жатқа соғатын Мереке Жаманов, сыпайы ғана жүретін жалғыз апай Өжікен Тыныбаева... Айтқандайын, қазіргі қоғам қайраткері Жасарал Куанышәлин де сабак жүргізетін. Қазақ тіл білімінен мүйізі қарағайдай Фатима Мұсабекова, Құлтай Бейсенбаева, Секерхан Хасанова, Асхат Әбліқаев, Ғабдолла Қалиев, неологизмтанушы Шәмшиябану Бәйтікова, кейінірек – аты елеулі Сейілбек Исаев, Нұржамал Оралбаева, доцент Бердібай Шалабаев, ара-арасында ол кезде аспирант (кейін қоғам қайраткері) Дос Көшімов пен жас оқытушы Гүлбану Қосымова дәріс берді. Осы ұстаздарымыздың ішінде профессор Фатима Мұсабекова өте адудынды адам еді. «Әуезов болам дей ме екен, Әуезовке еліктейді өзі» деп, сырбаз да сыпайы Нығмет Ғабдуллин ұстазымыздың өзін сыртынан бір тұқыртып қоятын. «Мұртты жігіт, құртты жігіт» деп, иегінде қыл-қыбыры бар студенттерге «құрт ана жұн-жүрқанды!» деп қырғидай тиіп, аудиториядан түре қуып шығатын. Фатима апай сол кезде жасы қырықтың ішіне кірген атақты жазушы Мұхтар Мағауиннің өзіне ұзынша етіп қойған желке шашына бола қарадай тиісіп отырады деп еститінбіз. Өкінішке қарай, дәл біз окуга түскен жылы Мұхтар Мағауин педагогтік жұмысын доғарған екен.

Секерхан Хасанова апайымыз бірінші курста араб графикасына негізделген қазақ әліпбійнен сабак берді. Халқымыз бұл әліпбиді XX ғасырдың 30-жылдарына дейін пайдаланыпты. Кейін білсек, біздің оқығанымыз Ахмет Байтұрсынұлы реттеген «төте жазу» екен. Ахаң бастаған Алаш арыстарының ол кезде ақталмаған кезі. Сәбит Мұқановтың «Өмір мектебі» романынан Ахаңның атын ғана білетініміз болмаса, затын ешкім білмейді. Ұстаздарымыз біліп тұrsa да айтпайды. Тек доцент Төкен Әбдірахманов қана дәріс арасында Мағжанның сыршыл өлеңдерінен сыр ұштығын шығарып қоятын. Айтайын дегенім, Дихан осы Секерхан апай дәріс беретін «төте жазуға» ерекше құлшыныспен ден қойды. Бұл пән бірінші курста ғана өтеді екен, кейін үйренген төтешемізді ұмытып қалдық. Ал Дихан сол кезде-ақ ескі мұраға есі ауарын білгендей көне әліпбиге көп қадалатын. Секерхан апай сепкен дән кейін оның өмірінің мәніне айналды. Оның институтты бітірген кезі Алаш арыстарының ақталған тұсымен тұспа-тұс келді. Сөйтіп, ол араб харпімен тасқа басылған Алаш арыстарының еңбектерін зерттеуге құлшына кірісіп, ғылым жолына тұсті. Осылайша, ол ғылымға төтеннен емес, төтешеден келген. Қындығы да, қызығы да мол студенттік жылдарға қайта оралсам, Алматының О.Жандосов пен «Правда» (қазіргі Алтынсарин) көшелерінің қылышындағы ҚазПИ-дің №6 жатақханасында тұрамыз. Екінші курста Дихан әскерге кеткенше сондағы № 209 бөлмеде тұрып, қара нанды бірге біліп жедік. Сабаққа баарда-қайтарда әбден жауыр қылып, ығыр болған көлігіміз – № 66-сары «гармошка» автобус. Комсомол мен Карл Маркс (қазіргі Төле би мен Д.Қонаев) көшесінің қылышындағы филфак орналасқан оку орнына созаландаپ жеткенше бір сағатқа жуық уақыт кетеді.

Ол заманда қызығы да, шыжығы да жетерлік жатақханада әскердегідей «дедовщина» бар. Болашақ мұғалімдердің арасында да сотқарлар табылады. Содан қашқалақтады ма, қазақ, орыс бөлімі бар, бірінші курсқа түсken жігітердің бәрі пәтерге шығып кетті. Бірінші курстан актөбелік Басқар деген жігіт пен Дихан үшеуміз ғана жатақханада қалып, бір бөлмеге орналастық. Пәтерге шығып кеткендердің бірі жатаққа келгенде жоғары курстан таяқ жеп, шалбарының ышқырын байлауға шамасы келмей, кең балақ түрсіімен далақтап қашып, қыздардың қыран-топан құлқісіне қалғаны бар. Ал шағын бойлы, жұқалтаң келген Диханның сыртына теуіп тұрған тектілігі, бойынан білінетін білімділігі, бала болса да байыптылығы талайдың мысын басып тастайтын. Ит-жыны барлардың өзі оның иманды жүзінен именетін болса керек. Дихан мен Басқар – мектеп партасынан шыға сала оқуға түсken сарыауыздар да, мен әскерден келген соң Жақатаста қара жұмыс істеп, орыс-қазағы аралас жұмысшы ортадан келгенмін. Абитуриент кезінде балмұздак жегендердің емес, сыра сіміргендердің сортынанмын. Дихан мен Басқар мен секілді «бұзылмаған». Қақ-соқпен жұмысы жок, тұра барып, тіке қайтады. Тәртіпті. Қашан болсын қолдарынан кітап түспейді. Сабактан соң көбіне бірігіп кітапханаға тартады. Бөлмені кезекпе-кезек тап-түйнақтай етіп ұстайды. Ал біз ол кезде талай ортасың жаман жақтарын, зиянды әдеттерді бойымызға сініргенбіз. Екеуін баласынып, айтқан ақылдарын құлағыма қыстырмайтын болсам керек. Керісінше, бөлменің астан-кестеңін шығарып, құлақ еттерін жеп, тыныш жатқан екеудің мазасын қашыратын кездерім ұшырасса керек. Талай жылдардан соң Диханның «Бірде өзіннен әбден мезі болған Басқар екеуміз саған жабылмақ болдық, бірақ әліміз келмей қала ма деп қорықтық» деп сыр ашқаны бар. Дыхаң екеуміз ілуде кездесе қалғанда сол бір студенттік шақтарды сағына еске алсак, әңгімеміз әдетте былайша өрбиді. Менің оны білетінім, оның мені білетінінің ширегіне де жетпейді-ау. Дихан ондайда бірінші болып сөз бастайды:

– Жатақхана түбінен бөтелке жинайтын қауға сақал орысты көріп: «Лев Николаевич Толстой, ты что делаешь? Ты – патриарх! Пусть пустых бутылок собирают пустые люди» деп айқайлаушы едің ғой «бозаның» буымен.

– Тұh, сен де қайдағы-жайдағыны ұмытпайды екенсің. Сен осыны айтпасан, есіме де түспес еді...

– Сен 1-курста ылғи автобустан адасатынсың. Азанда барлық студент жоғары жаққа қарай (институтқа қарай) мінсе, сен төмен қарай – қаланың шетіне қарай жүретін көлікке отыратынсың.

– Дыха-ау, отыз жыл бұрынғыны ұмытпапсың ғой.

– Төке, Береговой көшесінің бойындағы 74 тыын тұратын лапша есінде ме? – дейді ол тағы да. – Сен сол жерге кіргенде, шыққанда көзілдірігінді төмен басып, ыңылдан бірдене дейтінсің. Арық-тұрак болсан да, рухани қуатты едің. Арақ сені ешқашан жеңе алған жоқ. Бірақ темекіні қатырып тартатынсың. 50 қызды бәсекелестіріп қойған «Қызыл етік» өлеңінді ұмытамыз ба?..

ҚазПИ-де оқып жүргенде:

Досым-ай, жазшы өлеңді,

Үгітпен емес, үмітпен.

Өлеңін дәйім тұрсыншы,

Жұлдыздар ұқсап үріккен...

Жұлдыздар ұқсап үріккен,

Тұрсыншы көктен сыр айтып.

Жалықтым сұлу өлеңнен,

Сұлу сөздерден біріккен, –

деуші едің.

Кейде шашың ұйпа-түйпа болып, кеңестік кердең өмірге лағынет айтып:

Шоғында жанып темекінің маздаған,

Күндерім өтіп барады еріккен.

О, Муза, сенен жеріп пе ем?.. –

деп, өз-өзіңе келетінсің... – дейді ол тағы да.

Өзімнің де есімнен тарс шығып, баяғыда ұмытып кеткен өлеңдерімді еліміздегі маңдайалды оқу орнының проректоры Дихан Қамзабекбаласының аузынан қайта естігеніме рахаттанып, жадының соншалықты мықтылығына таңғаламын. Нағыз ғалымның ғана жады осындағы ұшқыр, зердесі зерек болса керек-ті. Ол кезде Дихан екі езуі жиылмайтын, өзі айтып, өзі қулетін ақсары бозбала еді. Жайшылықтың өзінде аузы ашылып, аттың тісіндей күрек тістері ақсиып алдына шығып тұратын. «Армияға барсан, алдымен тісі сынатын сен боласың. Мына тісің жұдырыққа өзі тіленіп тұрғой» деймін мен. Екінші курсың күзінде Дихан екі жылдық әскери борышын өтеуге аттанған. Самарадан оқалы түйме тағып оралғанында: «Төке-ау, сен тісімнің әскерде сынатының дәл болжаған екенсің. Бірақ біреу ұрып сындырмады, жазатайым құлап сындырып алдым» деп еді баяғыны есіме салып... Әскер демекші, сол екі жылдық әскери борышын өтегені Диханға құт болды-ау деймін. Неге дейсіз бе? Егер әскерге бар-май 1987 жылы окуды бітіргендеге, қарапайым әрі көпбалалы отбасынан шыққан Диханның өмірі басқаша өріліп, тіпті көп курстастарымен бірге жолдамамен алыс ауылдардың біріне мектеп мұғалімі болып кетуі де әбден мүмкінді. Ол кезде филфактағы оқу төрт жылдық еді де, кейін бес жылдыққа айналып, Диханның оқу бітірген кезі Алаш зиялышары акталып жатқан мезгілге тұспа-тұс келді де, уақыттың өзі оны алаштанушылық жолға бұрды. Сірә, Жаратушы жақсы көретін құлдарының жолын осылай оң жағынан орайластырып қоятын болса керек.

Не керек, студенттің боқшасын тастан, екі жыл солдаттың керзі етігін киген Дихан 1986 жылдың күзінде әскерден келгенде, біздің бітіріп қалған окуымыз орта жолдан үзіліп, амалсыздан ауылға жиналып жатқанбыз. Сондықтан Диханның кейінгі студенттік жылдарын қалай өткізгенін тап басып айта алмаймыз. Ол – Алматыда, біз – ауылда. Әйтеуір оқуын бітіре салағын жолына түскенін, кандидаттық диссертация корғаганын, Мәскеу, Петербор, Қазан, Уфа, Орынбор, Омбы, Ташкент мұрағаттарын тынбай адақтап, «ақтандық» тұлғаларға қатысты небір тың дерек, құнды мәліметтер тапқанынан мерзімді баспасөз арқылы хабардар едік. «Ана тілі», «Жас алаш», «Қазак елі» газеттерінен, «Жұлдыз», «Жалын», «Ақиқат» журналдарынан ойлы мақалаларын оқыған сайын марқайып қалатынбыз. Әлі Астана болмай тұрғанда-ақ Ақмолаға қоныс аударып, Л.Н.Гумилев атындағы Еуразия университеті казак әдебиеті кафедрасының менгерушісі болып қызметке тұрғанын да естіп-білдік. Қоғамның бір формациядан екінші формацияға

ауысқан аласапыран кезеңінде Диханмен бет көрісу тұрмак телефонмен тілдеспегенімізге бақандай он жыл өте шыққан еken. Соңғы рет Кеңес Одағының дүрілдеп тұрған шағында жолыққан біздер, одан кейін 1998 жылдың сәуір айында егемен еліміздің жаңа астанасы – Ақмола (Астана атауы сол жылы 6 мамырда берілді) қаласында бір-ақ ұшырастық. Оның жайыбы болған еді.

Ауылдың жағдайы мүшкілдене баста-ған 1991 жылы Созақ ауданынан Жаңатас қаласына қоныс аударғанмын. Жамбыл облысына қарағанмен Жаңатас Шолакқорғаннан жүз шақырымдай жерде ғана. Қаратай тау-кен басқармасы жанынан шығатын «Каратай кеншісі» – «Горняк Каратай» деген өндірістік газетте тілшімін. Газет шығару үшін апта сайын Тараз қаласына шапқылаймыз. Басылған газетті Қаратай мен Жаңатас қалаларына таратамыз. Сол Жаңатаста жүріп 1997 жылы пышақтың қырындағы тұңғыш жыр жинағымды Алматыдан шығарды. Кітабым шыққан соң кеудеме көкжелік кірді. Бір күні аяқастынан ойым бұзылды. Есіл-дертім – Астана (ол кезде Ақмола). Жаңа ғана елордасы болып жатқан қала, тұяғымды тезірек іліктіріп кетсем деймін. Отбасымды артынан алдырмақпын. Өз-өзіме өте сенімдімін. Сөйтіп, 1998 жылы 1 сәуірде жұмыстан өз еркіммен босап, ұжыммен қоштасып, асқақ арманмен, асау романтикамен Ақмолаға жалғыз тартып отырдым. Бұрын көрмеген, баспаған жерім. Пойыздан түсіп, жалдамалы пәтерге уақытша тұрактаған соң, көп жылдар көріспеген Диханды іздестірдім. Еуразия университетінен мекенжайын анықтап алып (ол кезде пәтерінде телефон жок), тіке Мағжан Жұмабаев көшесіндегі профессорлар үйіне тарттым. Қай қабат екені есімде жок, қоңырауын басқаным сол, есікті өзі ашты. Сәл толысқаны болмаса, сол баяғы студент кездегі Дихан, тұра мениң ізден келетінімді білгендей риясыз ыржияды. Арғы жақтан жарының, бала-шағасының бастары қылтияды.

Сол күні қона жатып, таң атқанша әңгімеліз таусылмады. Диханның «біздің үйде тұра бер» деген қолқасына қарамай, жатақханаға шықпақ болды. Оның реті тез келді. Комендантпен келісіп, тұра үйінің қасындағы университетке қарасты жатақханадан бір бөлме алып берді. Су тегін. Жаңадан ашылған «Ақмола ақшамы» газетінің жан-жақтан жасақталған тілшілері – жас шамамыз қатар Талғат Батырхан, Бекен Қайрат, Айтқадыр Тілеуов, жас журналист Амангелді Қияс осы жатақханада тұрады еken. Менің де аталған қалалық газетке қызметке тұрып қалудан дәмем зор.

Сөйтсем, асты-үстіне түсіп жатқан Ақмоланың мен түгілі, мынау деген дөкейлеріне де қарайтын мұршасы жок еken. Жаңадан ашылып, енді құрылып жатқан газет редакциясы тілшілік қызметке қабылдамады. «Астана ақшамы» газетінің бас редакторы дәмелендіріп, бақандай екі ай сарсытып күттіріп қойды. Ақыры айтқан сылтауы – «Алматыдан біреуді қүтіп отырмын!». Ол күткен адамы бәрібір келген жок. Дихан мені сүйрекендей болып талай шенде мен шекпендінің алдына апарады. Олардың біреуі шіренеді, біреуі ернін шүйіреді, біреуі кейінге шегереді.

Сондай сүрексіз күндердің бірінде мынадай алдымен шыжық, артынан қызық болды. Еуразия университеті жанындағы аялдамада қатты ойланып кетсем керек, келіп қалған автобусқа атып тұрып міне салғам. Үш-төрт аялдама жүргеннен кейін қарасам, қолымнан тастамайтын барсеткам жок. Зәрем зәр түбіне кетті. Бұқіл құжаттарым: еңбек кітапшам, дипломым, төлқұжатым, қысқасы, не керектің бәрі соның ішінде. Аялдамада қасыма қоя салып, ұмытып кеткенім анық. Автобустан атып түсіп, такси ұстай сап әлгі отырған жеріме жетіп келсем, барсетка тұрмак бәле де жок. Ары-бері қараймын, көрдім-білдім дейтін тірі жан жоқ. Дереу Диханға бардым. Оның да өң-түсі қашып кетті. Бірге жүгіріп жүріп, кешке дейін қалалық газетке, жергілікті телевидениеге хабарландыру бергізді, радиодан сұрау салғызды.

Бір күннің ішінде ине жұтқан иттей арып сала бердім. Ауылдан аттанғалы ай жарымнан асқаны, жұмыстың табылмағаны мынаның қасында түк болмай қалды. Әсіресе, әрең қолым жеткен дипломды Алматыға барып орнына келтіруді ойласам, ішегім түйнептүйнеп кетеді. Жатақханада әрнені ойладап, екі бүктетіліп жатсам, екі езуі екі құлағында, Дихан келіп тұр...

Сөйтсем, барсеткам бір оқушы баланың көзіне түсіп, ол оны «не де болса» үйіне алып барып, шешесіне көрсеткен. Еуразия университетінде қазақ әдебиетінен сабак беретін келіншек құжаттағы суретке қараса... кеше ғана кафедра менгерушісі Дихан Қамзабекұлы ертіп келіп таныстырган маған ұқсайды, аты-жөнім де келіп тұр. Дереу бастығына хабарласқан. Ол маған қарай жүгірген. Екеуміз әлгі баланың үйіне қарай ұштық. Мұндай да ғажайып болады еken. Сондағы қуанғанымды тілмен айтып жеткізе алмаймын (Батамызды үйіп-төккен сол бозбала кейін МГУ-ді бітіріпті...). Астанада қайтсем де тұрақтап қалсам деген арманым орындалмады. Қазақ ұлттық музика академиясының ректоры Айман Мұсақожаева қазақ тілі мен әдебиеті пәннің оқытушысы етіп қабылдамақ болды. Бірақ ол үшін сабак басталатын күзді күтуім керек. Қысқасы, мені Астананың емес, Алматының дәм-тұзы тартып тұр еken. Екі жарым ай дегендеге шілдеде ауылға қайттым.

Одан бері өткен уақыт он сегіз жылға аяқ басыпты. Сондағы қара балшығы қоныштан келетін Астана әлемге әйгілі қалаға айналды. Астананың алғашқы тұрғыны болу бақыты бұйырмаса да, күн сайын аралай жүріп көшелерінің көркею тарихына күәгер болу бақыты бұйырыпты. Сол өткен сәттерді ойласам, сабағынан босай сала қас қарайғанша табанынан таусылып маған жұмыс іздесетін, ол табылмағасын қарадай қажып, «Төке, мұншама қырсық, мұншама жолың ауыр болар ма еді?!» деп менен де төмен басы салбырап кететін Дихан есіме түседі.

Сонау 83-тің күзінде алғаш біз танысқан кездегі он жетідегі жұқалтаң сары бала – бозбала Дихан биылғы мешін жылы ел ағасы – елу деген елеулі жасқа ер салғалы отыр. Елімізге белгілі алаштанушы, абзal ғалым, филология ғылымдарының докторы, профессор. ҚР Ұлттық ғылым академиясының мүше-корреспонденті. Халықаралық Айтматов академиясының академигі. «Құрмет» орденінің иегері. Лев Гумилев атындағы Еуразия ұлттық университетінің проректоры. Бірнеше монография мен оку құралының, жүздеген өткір ойлы танымдық мақалалардың авторы. Диханның ғалымдық, ұстаздық, азаматтық, қайраткерлік сан алуан қырын айтып тауысу қыын. Оның бәрін мүйізі қарағайдай ғалымдар таратып айта жатар, ол біздің миссиямызға кірмейді. Мен үшін ел ағасы атанған Дихан дос – сол баяғы студент кездегі күрек тістері ақсиган ақсары бала секілденеді де тұрады...

*Суретте: 1983 жыл, 1-курста Диханмен бірге*

Тәшенов Төреғали